

Sabuda cosa sia a totz homes que en la era M<sup>a</sup>. CCC<sup>a</sup>. XXX<sup>a</sup>. VIII<sup>a</sup>., dimercles, XVIII dias dentz el mes de may, en presencia de mi, Thomas Xemeniz, escrivan public et jurat nothari dels juratz e del consseyll d'Estela e dels testimonis deius escriutz, como don Johan Lopiz d'Elarça, prevost d'Estela, havis embargat a don Sancho Pontz, mercader, fill de don Sancho Ponz de Sangossa, per razon que li demandava lo dit prevost los dotze diner del peage e de la costumpne nova que es en esta feria d'Estela, dizent quel devia dar per razon de bestias cavalars, que lo dit don Sancho Pontz e altres vezins de Sangossa havian vendudas e compradas en la dita feria. Lo dit don Sancho Pontz, tenent se per agreujat e dizent al dit prevost quel fazia força, prepara li fiança a don Domingo Gil lo joven, çapater, estant en present dizent e razonant lo dit don Sancho Pontz que, como los de Sangossa sian privilegiatz de temps ancian ença e del rey don Felip qui ara es e de la reyna dona Johana, nuestra dona [roto] ningun peage en tot lo regne de Navarra, que per esta razon non era tengut de [roto] en XII diner del peage por cada bestia, segont la costumpne nova de la dita feria. Et lo dit prevost respondili que per esta razon que sobredita es que no li recebria fiança ninguna, nin lo desembargaria si non li donas los diners o peyntz. Et lo dit don Sancho Pontz havi li de dar en peyntz una capa barrada, agreujantse e tenentse por forçat, como dit es dessus.

Testimonis son qui furen presentz, don Johan Thibalt, don Lop d'Urroz, don Pere Marin, don Miguel Santz, don Bertholomeo d'Azedo, don Johan Periz de Gaylla, don Pero Symon, don Pero Yeneguiz de Bidaurre e don Pere Thomas, juratz d'Estela e don Garcia Lopiz d'Elarça et Johan de Quintana e Pero Lopiz, vezins de Sangossa.

Et io, Thomas Semeniz, nothari sobredit, escrivi aquest public instrument, a pregaria e requeriment del sobredit don Sancho Pontz. Et aquest mio sig (Signo) ne acostumpnat y fazi e suy testimoni.

Reverso:

Testimonio de protesta de agravio que pidio don Sancho Pontz porque el preboste de Estella le pedia los doze dineros de peaje de cada bestia de la costumbre nueva de aquella feria, alegando ser libres de peaje los de Sangouessa. Era 1338, año de Christo 1300.